

KONTROL MOZIOA

“La Cumbre” eraikinaren eta lur eremuaren lagapena eta proiektuari buruzkoa

Juan Carlos Izagirre Hortelano EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2023ko uztailaren 17an Ogasuneko Batzordean aztertutako interpelazioaren ondorioa da.

JUSTIFIKAZIOA

2022ko ekainean Espainiako Gobernuak eta EH Bilduren Kongresuko taldeak, Memoriaren Legea aurrera ateratzeko negoziazioen haritik, ezaugarri finalista duen akordio bat lortu zuten, non jasotzen den Donostiako “La Cumbre” eraikina Donostiako Udalaren eskuetara pasatzea eta hura memoria historikoa berreskuratzeko erabiltzea.

Akordioan jasotzen zen Memoriaren Legea onartu eta urtebetera gauzatuta behar zela lagapena. Memoriaren Legea 2022ko urriaren 19an onartu zen; hau da, urtebete bete da dagoeneko.

Udal Gobernuaren geldotasuna ikusirik, interpelazioa aurkeztu genuen uztailan, eta 2023ko uztailaren 27ko udalbatzarrean EH Bilduk gai honi buruz aurkeztu zuen mozioaren inguruko eztabaidan, alkate jaunak esan zuen egina ziola eskaera ofiziala Espainiako Gobernuari “La Cumbre” eraikinaren lagapena gauzatu zedin.

Jakin genuen eskaera hori emailez bidalitako mezu labur bat izan zela, aipatutako udalbatzarraren bezperan igorritakoa, eta bertan alkateak eskatzen ziola Espainiako Gobernuko ordezkariari zehazteko zer urrats eman behar zituen udal honek lagapena gauzatzeko. Erantzuna izan zen eskaera Estatu Idazkaritzari helaraziko zitzaiola eta oporren ondoren hitzarmena landuko zela.

Urriaren 16an beste interpelazio bat aurkeztu genuen Ogasun Batzordean; besteak beste, orduz geroztik zer beste urrats egin diren eta lagapena sinatu den edo ez jakiteko, sinatu bada zehaztapenak ezagutzeko eta ez bada sinatu, epea behin agortuta, aukera hau ez galtzeko zer berme dugun jakiteko. Era berean, galdetu genuen zer proiektu lantzen ari zen Udal Gobernuaren espazio honetarako eta zeintzuekin ari den lantzen, lantzen ari bada.

Memoria Demokratikoaren Legeak jasotzen duenez, legearen berezko xedearekin bat datozen jardueretarako erabili behar da “La Cumbre” jauregia; alegia, memoria demokratikoa berreskuratu, babestu eta zabaltzeko. Horrez gain, legearen berezko xedea da arrazoi politiko edo ideologikoengatik, pentsamenduarengatik edo iritziengatik, kontzientziarengatik edo sinesmen erlijiosoengatik eta orientazio eta identitate sexualarengatik jazarpena edo indarkeria jasan zutenei aitortza egitea. Hori kontuan hartuta, EH Bilduk uste du nahikoa arrazoi dagoela “La Cumbre” jauregia estatu indarkeria jasan zuten biktimak aitortu eta haien mina erreparatzeko gune bilakatzeko.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

Udal Gobernuak batzordean emandako arrazoiak ez zitzaizkigun egokiak iruditu, dirudienez ez baita beste urratsik egin. Horrek agerian uzten duen utzikeria eta interes faltak kezkatzen gaitu, proiektuari buruz inolako azalpenik ez emateak ere kezkatzen gaituen bezala. Kontuan izan behar dugu jarritako epea agortu dela, eta lagapena arriskuan ere egon daitekeela.

Horregatik guztiarengatik, behean sinatzen duen zinegotziak honako KONTROL MOZIO hau aurkezten du:

- 1.- Donostiako Udalbatzak hertsiki eskatzen dio Udal Gobernuari “La Cumbre” eraikinaren eta lur eremuaren lagapena gauzatzeko egin beharreko lanak egin ditzala luze gabe, urte bukaerarako lagapena sinatuta egon dadin.
- 2.- Donostiako Udalbatzak hertsiki eskatzen dio Udal Gobernuari aurkeztu dezala, urtea bukatu aurretik, gune honen kudeaketaren inguruko proposamen bat: zer beste instituzio eta eragilerekin egin nahi duen, zer lan formula proposatzen diren, zer kudeaketa mota eta abar.
- 3.- Donostiako Udalbatzak hertsiki eskatzen dio Udal Gobernuari proiektua lantzeko eta gunea kudeatzeko unean memoria historikoa lantzen duten eragile sozialekin elkarlana sustatzea eta haiekin adostea.

Donostian, 2023ko urriaren 19an

Juan Karlos Izagirre Hortelano
EH BILDU udal taldeko bozeramailea